

Íslenska kalkþörungafélagið ehf
Hafnarteigi 4
465 Bíldudalur

Reykjavík 5. júní 2019
UST201901-100/F.T.
08.10.02

Efni: Samþykkt úrbótaáætlun

Umhverfisstofnun vísar í bréf sitt frá 3. maí 2019 þar sem stofnunin óskaði eftir uppfærðri úrbótaáætlun vegna frávíka sem skráð voru í eftirliti þann 15. nóvember 2018 og 28. febrúar 2019. Uppfærð úrbótaáætlun hefur nú borist stofnuninni.

Frávikin, úrbótaáætlun rekstraraðila og viðbrögð stofnunarinnar eru eftirfarandi:

Frávik úr vettvangsferð dags. 15. nóvember 2018

1. Grein 2.5 í starfsleyfi

Rekstraraðili skal vinna eftir umhverfisstjórnunarkerfi sem skal fjalla um yfirstjórnun og fela í sér umhverfisstefnu sem kveður á um stöðugar umbætur á verkferlum og útbúnaði, greiningu á regluverki um umhverfismál og það skal ná yfir vöktun á losun og umhverfisvöktun. Þá skal umhverfisstjórnunarkerfið fjalla ítarlega um hvernig lágmarka skal ryk frá dreifðum uppsprettum, þ.m.t. uppskipun og flutning hráefna.

Í uppfærðri úrbótaáætlun kemur fram að unnið er að uppfærslu gæðahandbókar fyrirtækisins og skuli því lokið fyrir lok júní 2019. Unnið verði að ákveðnum þáttum umhverfisstjórnunarkerfis um leið, því víða skarist það við gæðahandbók. Kerfið verður unnið í samræmi við umhverfisstjórnunarstaðalinn ISO 14001. Umhverfisstofnun veitir rekstraraðila frest til 1. október nk. til að koma á umhverfisstjórnunarkerfi í samræmi við kröfur starfsleyfisins.

2. Grein 3.3 í starfsleyfi

Eldsneyti skal geymt í geymum með árekstravörn sem uppfyllir ákvæði reglugerðar 884/2017 um varnir gegn olíumengun frá starfsemi í landi. Í eftirlitinu var staðfest að olíugeymar voru á lóðinni án fullnægjandi árekstravarna.

Samkvæmt uppfærðri úrbótaáætlun hefur rekstraraðili pantað árekstrarvarnir sem verða settar upp um leið og þær berast á Bíldudal. Áætluð verklok eru í lok júní 2019. Umhverfisstofnun fellst á framangreint.

3. Grein 3.3 í starfsleyfi

Frágangur á lóð skal vera snyrtilegur en mikið magn af byggingarúrgangi, brotajárni, tómun bömbum og öðrum úrgangi var á lóðinni. Í eftirlitinu kom fram að unnið er að tiltekt lóðarinnar, svo sem að senda brotajárn í endurvinnslu o.fl.

Í uppfærðri úrbótaáætlun rekstraraðila kemur fram að 12 gámar hafi farið frá verksmiðjunni með rusli, brotajárni og öðru sem safnaðist hafði upp. Verkinu sé ekki lokið en mikið hafi áunnist. Í eftirliti stofnunarinnar hefur komið fram að merki eru um að tiltekt standi yfir á lóðinni á brotajárni, timbri o.fl. og fellst stofnunin á áætlun rekstraraðila um að tiltekt ljúki á árinu 2019. Umhverfisstofnun mun fylgja framvindu úrbótaáætlunarinnar eftir í vettvangsheimsóknnum ársins.

Frávík úr fyrirvaralausri vettvangsferð dags. 28. febrúar 2019

1. Grein 3.4 í starfsleyfi

Sýnileg mengun var staðfest í eftirlitinu úr einum skorsteini verksmiðjunnar sem liggur upp frá kornun (granulation).

Samkvæmt úrbótaáætlun rekstraraðila er unnið að úrbótum varðandi rykmengun og stefnt að því að leggja fullmótaða áætlun með hönnunargögnum fyrir Umhverfisstofnun eigi síðar en fyrir lok september 2019. Unnið verði í samræmi við BATC staðla fyrir sement, kalk og magnesíumframleiðslu. Ásamt þessu er unnið að lágmarkun ryks með því að bæta síun alls tækjabúnaðar þó ekki liggi fyrir teikningar og hönnunarpplýsingar að fullu. Umhverfisstofnun fellst á úrbótaáætlun rekstraraðila.

2. Grein 3.13 í starfsleyfi

Gögn og ábendingar gefa til kynna að hávaði frá verksmiðjunni sé yfir ákvæðum reglugerðar nr. 724/2008 um hávaða að nóttu til. Niðurstöður mælinga gefa til kynna að hávaði í íbúabyggð sé oft á tíðum frá 50-55 dB(A). Staðfest var í eftirlitinu að uppruni hávaðans sé í verksmiðjunni.

Samkvæmt úrbótaáætlun rekstraraðila hefur verið gripið til þess að hægja á viftum og öðru sem olli hávaða. Þá þurfi að endurnýja einangrun í blásarastokki frá þurrkara í vatnshreinsikerfi. Einangrunarefni er í pöntun og verður gengið frá einangrun fyrir lok júní 2019. Umhverfisstofnun fellst á framangreint.

3. Grein 3.12 í starfsleyfi

Framleiðsluúrgangi (leirefnum) hefur verið safnað upp í stórsekki utandyra á undanförunum árum. Samkvæmt ákvæðum starfsleyfis skal úrgangi komið til endurnýtingar eða skipulagðrar förgunar.

Samkvæmt úrbótaáætlun rekstraraðila er fyrirhugað að endurpakka því sem er heilt af framleiðsluúrgangi sem safnast hefur upp í stórsekki utandyra. Stefnt er að því að það sem er endurpakkað fari til Frakklands þar sem efnið verður nýtt í áburðarframleiðslu. Áætluð verklok eru í lok september 2019.

4. Grein 4.2 í starfsleyfi

Útblástursmælingar sem framkvæmdar voru 2018 eru ekki fullnægjandi þar sem að eingöngu voru teknar mælingar í einum skorsteini af þremur. Gera þarf mælingar í öllum skorsteinum/reykháfum.

Stefnt að því að næsta mæling verði gerð úr öllum skorsteinunum þremur og féllst stofnunin á þá áætlun í bréfi sínu frá 3. maí. Umhverfisstofnun óskaði eftir niðurstöðum mælinganna þegar þær liggja fyrir. Í uppfærðri áætlun rekstraraðila kemur fram að stefnt sé að koma í veg fyrir að ryk fari út um aðra skorsteina. Stofnunin leggur áherslu á að mælingarnar eru til þess að sannreyna að búnaðurinn sé að virka sem skyldi.

Umhverfisstofnun fellst á úrbótaáætlun rekstraraðila en úrbætur vegna frávíkanna verða teknar út í næsta eftirliti.

Verði frávikum ekki lokið eða ef áætlun um úrbætur gengur ekki eftir mun Umhverfisstofnun fylgja frávikunum eftir þaðan sem frá var horfið.

Umhverfisstofnun bendir á að bréf þetta verður birt á heimasíðu stofnunarinnar.

Virðingarfyllst


Halla Einarsdóttir
teymisstjóri


Frigg Thorlacius
lögfræðingur